

թերի մեկնությունը՝ հենվելով Հովհան Ոսկեբերանի, Եփրեմ Ասորու, Կյուրեղ Աղեքսանդրացու և ուրիշների վրա: Գանձակեցին ասում է, որ Անանիան իր այդ աշխատությունը գրել է «համառօտ վասն դիւրահասութեան ընթերցողաց»:

Թվելով Անանիայի երկասիրությունները, Գանձակեցին ասում է, որ նա գրել է նաև ավետարանների խորհրդական և մտավոր տեսությունը, նրանց համեմատությունը, «գրեաց և լուսաւոր իմացուածս վասն խորհրդական սրբասացութեանս, որ յեկեղեցիս ուղղափառաց խաչեցարիւ ասեն և ներբողեանն Շողակաթին»¹:

Միանգամայն ճիշտ է նկատել Գ. վ. Զարբանալյանը, որ Գանձակեցու հիշատակած ներքողեանն Շողակաթին-ը պետք է ձեռագրերում պահպանված «Երանելոյ հօր Անանիայի հոգեվարժ փիլիսոփայի ներբողեան, ասացեալ ի սուրբ կաթողիկէն, որ է ի Նոր Քաղաք, որ այժմ կոչի Վաղարշապատ» գրվածք լինի:

Սակայն, Անանիա Սանահնեցու կարևոր աշխատությունը, մեր կարծիքով, պետք է համարվի «Անանիայի վարդապետի հայոց՝ բան հակաճառութեան ընդդէմ երկաբնակաց. զոր գրեաց հրամանաւ տեառն Պետրոսի հայոց վերադիտողի» վերնագիրը կրող գործը, որ առավել շարժում էր ինքնուրույն է՝ և ունի գեղեցիկ ու զարդարուն ոճ:

Զարբանալյանը, բացի վերոհիշյալից, Անանիա Սանահնեցու մյուս աշխատությունների ցանկն է դրել իր գրքի մեջ, որտեղ վեց խրատական, կրոնա-բարոյական և աստվածաբանական աշխատություններ են նշված, բոլորն էլ պահպանված հին ձեռագրերի մեջ²:

Նույնպիսի մի ցուցակ էլ մեջ է բերել իր հոդվածում Եր. Ս.-ն, որն ունի Անանիա Սանահնեցու 15 աշխատություն³: Անանիա Սանահնեցու «Բան հակաճառութեան ընդդէմ երկաբնակաց» աշխատության միջից պատկերամարտության վերաբերյալ հատվածը հրատարակված է Արիստ. Սեդրակյանի «Հայաստանյայց եկեղեցու պատկերահարգությունը» ուսումնասիրության 127—131 էջերում, աշխարհաբար թարգմանության հետ միասին⁴:

Անանիա Սանահնեցու կենսագրությունից գրեթե ոչինչ չգիտենք, բայց գրվածքների քանակից և բնույթից երևում է, որ նա երկար տարիներ ապրել է Սանահնի վանքում և իբրև հոգևորական, բացի պաշտոնական զբաղումներից, եղել է վանական դպրոցի գլխավոր ուսուցիչներից մեկը:

Դիտակորոսի նշանավոր աշակերտներից մեկն էլ Հակոբոս Սանահնեցին է եղել, որ իր ծննդյան տեղի անունով կոչվել է նաև Քարաբնեցի, իսկ հայրանունով Յակոբ Քարահատայ որդի (Ուռհ., էջ 179):

¹ Պատմութիւն Հայոց, արարեալ Կիրակոսի վարդապետի Գանձակեցւոյ, էջ 104:

² Պատմութիւն հայերեն դպրութեանց, Վենետիկ, 1865, էջ 470—472: Այս գրվածքի մասին Կարապետ եպ. «Կնիք հաւատոյ»-ի հրատարակութեան առաջաբանում կասկած է հայտնում, որ կարող է Անանիա Նարեկացուն պատկանել (էջ 109):

³ Եր. Ս.-ն հետևյալ ցուցակն է մեջ բերել՝

- ա) Մեկնութիւն չորեքտասան թղթոցն Պաւղոսի
- բ) Բան հակաճառութեան ընդդէմ երկաբնակաց
- գ) Խրատ ողեշահ, թէ որպէս կարասցէ մարդ գմխտ որոշել յերկրաւորացս
- դ) Խրատ քահանայից
- ե) Ի խորհուրդ Յովհաննու մարգարէի
- զ) Անանիայի դրուատ ի սուրբ Մկրտչին Յովհաննէս
- է) Սակս անխտիր հաղորդելոյն Յունաց
- ը) Վասն խոնարհութեան
- թ) Վասն համբերութեան և խաղաղութեան
- ժ) Վասն զղջման և արտասուաց
- ժա) Վասն անցաւոր աշխարհիս
- ժբ) Վասն ապաշխարութեան
- ժգ) Յաղագս խորհրդոց
- ժդ) Խրատք (և այլ քարոզներ)
- ժե) Մեկնութիւն Մատթէոսի աւետարանին:

«Արարատ», 1901 թ., մայիս և հունիս, էջ 274—275:

⁴ Հայաստանյայց եկեղեցու պատկերահարգութիւնը, աշխ. Արիստակէս եպիսկոպոսի, ՍՊԲ, 1904, էջ 127—131: